

四庫全書

經部

欽定四庫全書

經部

慈湖詩傳卷十九

詳校官監察御史_臣邱庭澍

通政使司副使_臣莫瞻菴覆勘

膳錄監生_臣馮克鞏

膳錄監生_臣董誠

欽定四庫全書

慈湖詩傳卷九

宋 楊簡 撰

秦

有車鄰鄰有馬白顛未見君子寺人之令阪有漆隰有
栗既見君子並坐鼓瑟今者不樂逝者其耄阪有桑隰
有楊既見君子並坐鼓簧今者不樂逝者其亡

是詩士樂秦國之盛說秦君之優禮願仕其國而不
去之也而毛詩序曰車鄰美秦仲也秦仲始大有車

馬禮樂侍御之好焉失詩人之情矣鄰鄰言車之多
若居室之比鄰白顛毛傳曰的顛也寺人內小臣也
君子謂秦君也士自他國而至秦未見秦君則有寺
人司傳報之事使寺人傳告焉令使也爾雅釋地云
下濕曰隰又云陂者曰阪郭璞云陂陀不平陂即坡
字小雅正月云瞻彼阪田坡上有漆木隰中有栗木
漆可以為器用栗可以充籩實桑可以蠶楊可以矢
釋木云楊蒲柳郭云可以為箭左傳所謂董澤之蒲

車如此盛馬如此美漆栗桑楊咸可食用樂秦之盛
姑舉其大既見秦君燕禮相好並坐鼓瑟情親禮優
若朋友然故士樂為之臣曰今者不於此樂焉止焉
苟逝往他國必其耄老而已矣不復有過於秦者矣
不復得志老且死亡矣釋樂云大瑟謂之灑郭云長
八尺二寸廣一尺八寸二十七絃世本曰庖犧作五十
絃黃帝素女鼓瑟哀不自勝乃破為二十五絃禮舊
圖云雅瑟長八尺一寸廣一尺八寸二十三絃其常

用者十九絃其餘四絃謂之番番羸也頌瑟長七尺
二寸廣一尺八寸二十五絃盡用之樂記云清廟之
瑟朱絃而疏越越瑟底孔也簧釋見王風君子陽陽
周易離卦云大耋之嗟

駟鐵孔阜六轡在手公之媚子從公于狩奉時辰牡辰
牡孔碩公曰左之舍拔則獲遊于北園四馬既閑輶車
鸞鑣載獫馵獫

碩補音常約切大也禮記諺有之曰人莫知其子之

惡莫知其苗之碩太元斷首我心孔碩乃後有鑠說
文以石得聲漢石顯傳民歌曰牢耶石耶五鹿客耶
印何纍纍綬若若耶拔蒲末反輜由九反又音由

毛詩序曰駟鐵美襄公也始命有田狩之事園囿之
樂公得士民之歡心而後有是詩也而序不及之毛
傳曰鐵驪阜大也孔甚也阜壯盛也孔疏云檀弓云
夏后氏尚黑色鐵者言其色黑如鐵每馬有二轡四
馬當八轡矣諸文皆言六轡者以驂內轡納之于轂

故在手者惟六轡爾公之媚子當是公之子媚者美
稱也毛傳曰時是辰時也冬獻狼夏獻麋春秋獻鹿
豕羣獸鄭箋云奉時辰牡者謂虞人也孔疏云虞人
奉是時節之牡獸謂驅以待公射之公戒御者曰從
左而逐之公乃親自射之舍放矢括則獲其獸冬獻
狼以下皆天官獸人文鄭箋云拔括也毛傳曰閑習
也輜輕也獫狫獫田犬也長喙曰獫短喙曰狫獫今
從釋文作馵獫爾雅狗屬長喙獫短喙獨獫鄭箋云

置鸞於鑣異於乘車也孔疏云鸞和所在經無正文
經解注引韓詩內傳曰鸞在衡和在軾又大戴禮保
傳篇文與韓詩說同故鄭依用之蓼蕭傳曰在軾曰
和在鑣曰鸞箋不易之異義戴禮載毛氏二說謹按
六經無明文且殷周或異故鄭亦不駁商頌烈祖箋
云鸞在鑣以無明文且殷周或異故鄭為兩解朱曰
田事已畢故遊于北園以車載犬蓋以休其足力也
韓愈畫記有騎擁田犬者亦此類廣韻云鑣馬銜

小戎伐收五檠梁輶游環脅驅陰勒塗續文茵暢轂駕
我騏驎言念君子溫其如玉在其板屋亂我心曲四牡
孔阜六轡在手騏驎是中駟驪是驂龍盾之合塗以輶
輶言念君子溫其在邑方何為期胡然我念之伐駟孔
羣公矛鏐鏐蒙伐有苑虎韞鏐膺交韞二弓竹閉緄縢
言念君子載寢載興厭厭良人秩秩德音

驅補音周官驅逆之車蕭該漢書音義驅駟皆居懼切班
固東都賦舉烽伐鼓申令三驅輕車霆激驍騎電騫

蔡邕釋誨驅與數與路叶嵇康賦驅與赴叶黃香九
官賦驅與御叶簡謂輕懼切勒音尹鎔音沃鼻之樹
反是詩婦人閔其君子之從戎閔而思之因叙車
馬之詳不以敗聞故其辭平衛宏不熟觀本詩情旨
旁求外說贅矣曰小戎美襄公也備其兵甲以討西
戎西戎方強而征伐不休國人則矜其車甲婦人能
閔其君子焉惟此閔其君子為得其情夫婦至情奚
勞勉強而宏曰能亦非也夫婦正情天地大義人皆

有是正情而自不知其與天地為一此固非宏之所
知也故雜推外說滋惑人心毛傳曰小戎兵車也淺
淺收軫也五五束也檠歷錄也梁輶輶上句衡也一
輶五束束有歷錄鄭箋云此羣臣之兵車故曰小戎
孔疏云淺淺釋言文收軫者相傳為然軫者車之前
後兩端之橫木也蓋以軫所以收斂所載故名收焉
輶者輶也五檠梁輶以皮革五處束之因以為文章
歷錄然輶從軫以前稍曲而上至衡之上而嚮下句

之如屋梁之隆起轅即輈故曰梁輈而孔䟽謂衡則
橫居輈下如屋之梁非也今屋有衡平橫其前惟梁
隆起此曰梁輈不曰梁衡孔䟽之差於是益明五束
施於如屋梁隆起曲處防木理之斷折也故曰五檠
梁輈毛傳曰游環勒環也游在背上所以禦出也脅
驅慎駕具所以止入也陰掩軌也勒所以引也塗白
金也續續勒也文茵虎皮也暢轂長轂也騏騏文也
左足白曰鼻孔䟽云兵車言淺軫長轂者對大車平

地載任之車為淺為長也考工記云輿人為車輪崇車廣衡長參如一參分車廣去一以為隧註云兵車之隧四尺四寸鄭司農云隧謂車輿深也則兵車當輿之內從前軫至後軫惟深四尺四寸也車人云大車牝服按原本牝誤作牡二柯有參分柯之二則大車從前軾至後軾其深八尺兵車之輪崇六尺有六寸桴其漆內內而中誣之以為之轂長註云六尺六寸之輪漆內六尺四寸是為轂長三尺二寸考工記又說車人為

車柯長三尺轂長半柯是大車之轂長尺半也兵車之轂比之為長鄭司農云斧柯因以為度鄭箋云游環在背上無常處貫驂之外轡以禁其出脅驅者著服馬之外脅以止驂之入揜軌在軾前垂軛上蓋續白金飾續鞞之環孔疏云游環者以環貫鞞游在背上故謂之鞞環也貫兩驂馬之外轡引轡為環所束驂馬欲出此環牽之故所以禦出也定本作鞞環脅驅者以一條皮上繫於衡下繫于軛當服馬之脅愛

慎乘駕之具驂馬欲入則此皮約之所以止入也陰
揜軌者謂輿下三面材以板木橫側車前所以陰映
此軌故云揜軌也靽者以皮為之繫於陰板之上令
驂馬引之何則此車衡之長惟六尺六寸止容二服
而已驂馬頸不當衡別為二靽以引車故云

按原本故
云二字脫

哀二年左傳稱郵無郵說已之御云兩靽將絕吾能
止之是橫軌之前別有驂馬二靽也釋器云白金謂
之銀鍍非白金之名謂銷此白金以沃灌靽環今俗

以錫鍍鐵為飾錫亦白亦金類未必皆銀也劉熙釋
名云鍍沃也續續鞫端也文茵虎豹皮之屬馬之雜
色有文者名騏詳釋見曹風鴝鵒易震為鼻足釋畜
云馬後右足白驤左足白鼻釋畜又云膝上皆白惟
鼻郭璞曰馬膝上皆白惟鼻後左腳白者直名鼻地
理志云天水隴西山多林木民以板為屋秦戎之郊
多板屋歟念君子從戎今在板屋思君子溫如玉
而今遠役亂我心曲心之深曲處也六轡釋見駟鐵

毛傳曰黃馬黑喙曰駟箋云赤身黑鬣曰駟中中服
駟兩駟也孔疏云若身鬣俱赤則為駟馬車駕四馬
在內兩馬謂之服在外兩馬謂之駟爾雅云白馬黑
喙曰駟郭璞曰今之淺黃色者為駟馬說文云黃馬
黑喙曰駟驪鐵也色黑如鐵駟鐵毛傳曰鐵驪毛傳
曰龍盾畫龍其盾也合合而載之孔疏云盾以木為
之輓駟內轡也箋云輓之腹以白金為飾也輓繫于
軾前孔疏云駟馬內轡之末鍍金以為腹輓之於軾

前四馬八轡而經傳皆言六轡明有是轡當繫之驂
馬內轡不須牽挽故知納驂內轡繫於軾前毛傳謂
在敵邑未必然邑者君子所居之邑也婦人雖因君
子遠役而思其未從戎而在邑之時溫溫然和也思
念之及此方今以何為期言何日可歸也胡然者言
胡為若是也言何故而興戎也我念之焉念其君子
也毛傳曰伐駟四介馬也孔甚也公三隅矛也鏹鏹
也蒙討羽也伐中干也苑文貌箋云伐淺也謂以薄

金為介之札介甲也甚羣者言和調蒙厖也討雜也
畫雜羽之文于伐故曰蒙伐方言云盾闕東或謂之
敝毛傳曰虎虎皮也韞弓室也膺馬帶也交韞交二
弓於韞中也閉紲緄繩滕約箋云鏤膺有刻金飾也
孔疏云以竹為閉置于弓隈然後以繩約之伐駟是
用淺薄之金以為四馬之甲成二年左傳說齊侯與
晉戰云不介馬而馳之是戰馬皆被甲也公矛三隅
矛刃有三角曲禮曰進戈者前其鏹後其刃進矛戟

者前其鎛是矛之下端當有鎛也彼註云銳底曰鎛
平底曰鎛夏官司兵掌五盾各辨其等以待軍事註
云五盾干櫓之屬其名未盡聞也言辨其等則盾有
大小襄十年左傳說狄虎彌建大車之輪而蒙之以
甲以為櫓櫓是大盾故以伐為中干干伐皆盾之別
名也膺冑也鏤膺是馬帶若今之鏤冑春官巾車說
五路之飾皆有樊纓註謂今馬大帶也彼謂在腹之
帶與膺異也然膺亦近腹矣既夕記說明器之弓云

有鞆註云鞆弓槩也弛則縛之於弓裏備損傷也以竹為之引詩云竹閉緄滕然則一名鞆也考工記弓人註云緄弓鞆也詩言金路皆云鈎膺婦人思念其夫遠行或寢或興勞勤道途又思其德性厭厭靜善其德音又秩秩皆善秩秩猶每每不一也愛而念之故思及此毛傳曰厭厭安靜也

蒹葭蒼蒼白露為霜所謂伊人在水一方溯洄從之道阻且長溯游從之宛在中央蒹葭淒淒白露未晞所

謂伊人在水之湄。遡洄從之道阻，且躋。遡游從之，宛在水中坻。蒹葭采采，白露未已。所謂伊人在水之涘。遡洄從之道阻，且右。遡游從之，宛在水中沚。

爾雅釋草云：蒹，蘆葭；葭，蘆郭云：蘆似萑而細，高數尺。陸璣云：蒹，水草也，可食。牛葭可以為薪，為薄。夫蒹葭易生之草，彌望無際，蒼蒼其盛，及白露凝焉而為霜，則所謂蒼蒼者黃而衰矣。喻秦國雖盛，有以害其盛矣。所謂伊人以道德自重，不肯自至，秦不得斯人而用。

之實為疵其所以不能致伊人者有小人在側歟德
禮之未至歟雖盛而衰必有以害之歟毛傳衛序雖
穿鑿無取然咸以禮為言序刺襄公未能用周禮得
非古說譏秦不能以禮致賢歟古說久而浸失故毛
傳穿鑿歟然考本詩白露為霜未晞未已之意殆有
失德小人在側故賢者不肯至歟逆流而上曰遡洄
流洄曲行陸以從之而道阻且長游者游於水中而
從之而伊人在水中央凡是皆形容伊人不肯自至

之意躋升也升則勞而難右亦言回曲之意湄者水
涯微曲如眉歟渙者水之涯渙方舟以濟之地歟坻
小渚汙亦同亦猶中央淒淒者衰之初采采者人采
取之多又白露未已霜露摧之其衰甚矣

終南何有有條有梅君子至止錦衣狐裘顏如渥丹其
君也哉終南何有有岵有堂君子至止黻衣繡裳佩玉
將將壽考不忘

裘補音渠之切易林剝之巽曰蔡侯兩裘久苦流離

大過之困曰送我貂裘與福載來來陵之切說文以
求得聲曹大家東征賦貴賤貧富不可求兮正身履
道以俟時兮古求亦渠之切此音起或作紀 秦君
至周之終南終南之人感秦君之德愛而說之作是
詩也周人作之秦人歌之得是詩於秦歟攷之史則
周平王避犬戎之難東遷洛邑秦襄公以兵送至洛
平王封襄公為諸侯賜之岐以西之地曰戎無道侵
奪我岐之地秦能攻逐戎即有其地終南之人感襄

公既力戰以救周又以兵送護平王東遷念無以報
之曰終南何有不過有條爾有梅爾言無以報之無
以贈之也君子謂秦君也秦君錦衣狐裘顏如渥丹
歎曰其君也哉美其儀容之盛真國君也古已字屺
屺者殆山之雙巖似屺歟按此字從崔
靈恩集注爾雅云畢堂
牆李廵曰厓似堂牆曰畢終南何有有屺爾有堂爾
尤言其無所有無以贈秦君也壽考祝秦君之壽也
不忘不忘秦君之德也毛傳曰終南周之南山中南

也地理志稱扶風武功縣東有大山古文以為終南
昭四年左傳曰荆山中南九州之險是一名中南也
毛傳曰條稻梅柟也釋木云稻山榎郭璞云今山楸
也陸璣疏云稻今山椒也亦如下田楸爾皮葉白色
亦白材理好能溼可為棺木玉藻曰君衣狐白裘錦
衣以裼之注云君衣狐白毛之裘則以素錦為衣覆
之使可裼也袒而有衣曰裼鄭箋云渥丹赤而澤也
今俗曰紅潤考工記績人黑與青謂之黻五色備謂

之繡黻衣衣裳之總稱書言十二章黻居其末舉黻則餘包之矣故孔子曰禹致美乎黻冕亦以黻為衣裳之總稱天子與諸侯服章雖不同而皆有黻此又曰繡裳者欲明備五色之美毛詩序曰終南戒襄公也能取周地始為諸侯受顯服大夫美之故作是詩以戒勸之本詩無戒勸之意毛衛穿鑿襄公雖受逐戎有地之誓十二年伐戎至岐而卒至子文公始能取其地而衛序曰能取周地非也

交交黃鳥止于棘誰從穆公子車奄息維此奄息百夫
之特臨其穴惴惴其慄彼蒼者天殲我良人如可贖兮
人百其身交交黃鳥止于桑誰從穆公子車仲行維此
仲行百夫之防臨其穴惴惴其慄彼蒼者天殲我良人
如可贖兮人百其身交交黃鳥止于楚誰從穆公子車
鍼虎維此鍼虎百夫之禦臨其穴惴惴其慄彼蒼者天
殲我良人如可贖兮人百其身

毛詩序曰黃鳥哀三良也國人刺穆公以人從死而

作是詩也本詩初無刺穆公之意按史記殉者百七十人未必皆穆公命之使殉已也殆穆公惠愛入人之深西戎之俗以從死為常耳是詩哀三良而已矣哀三良正心也道心也故孔子取焉若是詩以殉葬為善孔子將刪去之交交其飛相交也交交桑扈亦然孔疏曰止于棘得其所今良臣從死是不得其所朱曰以所見起興也盡殺曰殲言殺良人之多也百夫之防言其智勇足以護防百夫百夫之禦言其忠

勇足以當百人之敵可禦百夫也

馱彼晨風鬱彼北林未見君子憂心欽欽如何如何忘
我實多山有苞櫟隰有六駮未見君子憂心靡樂如何
如何忘我實多山有苞棣隰有樹檤未見君子憂心如
醉如何如何忘我實多

櫟盧狄反補音歷各切說文以樂得聲左氏傳在櫟
釋文書灼切輔櫟力各切漢書都櫟陽蘇林音藥簡
觀風與林棣與檤不叶此則亦不必叶 毛詩序曰

晨風刺康公也忘穆公之業始棄其賢臣焉毛傳曰
馱疾飛貌晨風鷗也釋鳥云晨風鷗毛傳曰先君招
賢賢人從之馱疾如晨風之飛入北林程曰林木茂
盛則飛鳥所集朝廷有道則賢者所就未見君子思
見君子以未得為憂憂思之中有敬心焉不敢忽易
也故曰欽欽如何如何而今乃不然矣今忘我實多
異乎昔者雖不敢明指而隱然念其先君之意可見
矣憂心欽欽已上皆指先君也叢生曰苞秦人謂柞

櫟為櫟孫炎曰櫟實橡也今俗曰橡斗子味如栗毛
傳謂駁如馬倨牙食虎豹諸儒說皆不安下章云山
有苞棣隰有樹櫟皆山隰之木相配不宜云獸爾雅
釋木云駁赤李子赤安知此六駁非赤駁之訛乎詩
中字訛者亦多釋木云常棣子如櫻桃可食櫟一名
羅郭云今楊櫟也實似梨而小酢可食陸璣云一名
赤羅一名山梨一名鹿梨一名鼠梨夫櫟駁棣櫟皆
果實可食喻秦國人材皆可用昔先君未見君子憂

心靡樂如醉思見賢者其切如此如何如何而今不然也忘我舊臣盖亦甚矣故曰忘我實多是詩與權輿相類

豈曰無衣與子同袍王于興師修我戈矛與子同仇豈曰無衣與子同澤王于興師修我矛戟與子偕作豈曰無衣與子同裳王于興師修我甲兵與子偕行

按此篇永樂大典缺卷

我送舅氏曰至渭陽何以贈之路車乘黃我送舅氏悠

悠我思何以贈之瓊瑰玉佩

毛詩序曰渭陽康公念母也康公之母晉獻公之女
文公遭驪姬之難未反而秦姬卒穆公納文公康公
時為太子贈送文公於渭之陽念母之不見也我見
舅氏如母存焉及其即位思而作是詩也熟詳詩辭
殆非追思而作者毛傳曰母之昆弟曰舅爾雅釋親
云母之昆弟為舅鄭箋云渭水名也秦是時都雍至
渭陽者蓋東行送舅氏于咸陽之地孔疏云雍在渭

南水北曰陽晉在秦東行必渡渭毛傳曰贈送也乘黃四馬也瓊瑰石而次玉董曰巾車金路以封同姓象路以封外姓革路以封四衛木路以封蕃國皆諸侯也故人君之車曰路車朱曰乘黃四馬皆黃也孔疏云佩玉唯天子用純諸侯則玉石雜故知瓊瑰是美石次玉太子奉公命而送舅所贈公贈之也

於我乎夏屋渠渠今也每食無餘于嗟乎不承權輿於我乎每食四簋今也每食不飽于嗟乎不承權輿

按此篇永樂大典缺卷

陳

子之湯兮宛丘之上兮洵有情兮而無望兮坎其擊鼓
宛丘之下無冬無夏值其鷺羽坎其擊缶宛丘之道無
冬無夏值其鷺翻

子者陳君也狡童維子之故褰裳子惠思我山有樞
子有衣裳皆指君也毛傳曰湯蕩也四方高中央下
曰宛洵信也爾雅釋邱云宛中宛邱陳君雖遊蕩而

慈惠於人有情今俗語亦有此此曰信於人有情但
無望爾望謂譽望謂不為人所觀仰坎擊之聲也羽
翻一也舞者所持以翳身亦以指麾無冬無夏值遇
其舞也缶瓦器擊之為樂今亦有之毛詩序曰宛邱
刺幽公也淫荒昏亂遊蕩無度焉史記無所考鄭箋
亦云子者幽公也毛傳曰子大夫也於此益驗衛宏
作序與毛異義

東門之枌宛丘之栩子仲之子婆娑其下穀旦于差南

方之原不績其麻市也婆婆穀旦于逝越以駸邁視爾
如收貽我握椒

爾雅釋木云榆白粉邢疏云榆之皮色白者名粉郭
璞云粉榆先生葉却著莢皮色白然皮白亦有無莢
者榆有十種葉皆相似惟皮色白者名粉釋木云栩
杼郭云柞樹邢疏云栩一名杼詩唐風云集于苞栩
陸璣疏云今柞櫟也其子為阜或言阜斗其殼為汁
可以染阜或言杼斗釋訓云婆婆娑舞也蓋舞之容也

釋詁云穀善也差擇也穀旦猶俗云好天氣晴和之
旦也男子出而擇女南方原氏之女不績其麻而舞
於市春秋莊二十七年季友如陳葬原仲則陳有原
氏子仲皆其著者逝往也越於也邁行也鄭箋云駸
總也欲男女合行於其所期會之處乎毛傳曰菽苳
苳也釋草云菽蚍蛄郭璞云今荆葵也似葵紫色謝
氏云小草多華少葉又翹起陸璣云苳苳一名荆葵
似蕪菁紫綠色可食微苦鄭箋云男女交會而相悅

曰我視女之顏色美如芄菜之華女遺我一握之椒
交情好也椒芬香之物商頤稱醴假無言醴亦總也
毛詩序曰東門之粉疾亂也幽公淫荒風化之所行
男女棄其舊業亟會於道路歌舞于市井爾

衡門之下可以棲遲泌之洋洋可以樂飢豈其食魚必
河之魴豈其取妻必齊之姜豈其食魚必河之鯉豈其
取妻必宋之子

毛詩序曰衡門誘僖公也愿而無立志故作是詩以

誘掖其君也毛傳曰衡門橫木為門言淺陋也棲遲
從容盤桓也言雖至貧陋之所亦可從容自樂也泌
之水洋洋自樂雖飢不足食亦有可樂者焉齊姜姓
宋子姓當是陳嘗請昏于二國二國不從陳君質弱
凡百不振重以請昏齊宋不獲益沮喪無聊故詩人
誘掖之歟詩意言陳國雖小亦足自立自樂奚必娶
於齊宋而後能立能國鄭箋乃以食魚娶妻皆以為
喻喻君任臣何必聖人亦取其忠孝而已箋說非陳

君惟其懦而無志故作詩以啟之若君有必求聖臣之志則亦禹湯文武之君也豈得謂之無立志耶史記僖公無所書

東門之池可以漙麻彼美淑姬可與晤歌東門之池可以漙紵彼美淑姬可與晤語東門之池可以漙菅彼美淑姬可與晤言

毛詩序曰東門之池刺時也疾其君之淫昏而思賢女以配君子也疾之為言甚矣犯矣非詩人之情也

是詩含隱不露詎敢曰疾之耶毛傳曰池城池也鄭箋云淑姬賢女也孔疏云姬姜婦人之美稱閨門之內歌笑晤言固足以深入人心思得賢女以配君子笑歌晤言有以浸潤漸漬成人君之正德故以漚麻漚紵漚菅為喻晤者相語相曉諭之謂釋草云白華野菅陸璣疏云菅似茅而滑澤根下五寸有白粉者柔韌宜為索漚尤善紵字本作苧後世績苧如絲之細故作紵字非古也

東門之楊其葉牂牂昏以為期明星煌煌東門之楊其
葉肺肺昏以為期明星皙皙

毛詩序曰東門之楊刺時也昏姻失時男女多違親
迎女猶有不至者也毛傳曰牂牂盛貌言男女失時
不逮秋冬禮曰冬合男女毛傳言秋何也鄭箋云親
迎之禮以昏時女留他色不肯時行乃至大星煌煌
然昏禮行事必用昏昕昏昕陰陽之交男女之義也
聖王制禮寓義使人知男女之事即天地之大義易

曰歸妹天地之大義也

墓門有棘斧以斯之夫也不良國人知之知而不已誰
昔然矣墓門有梅有鵲萃止夫也不良歌以訊之訊予
不顧顛倒思予

鵲尸驕反訊補音息悴切

按原本三字脫

釋文又作諱開元

五經文字諱音崇注云詩歌以諱之龍龕手鑑雖醉
切亦引此詩而以訊為諱以之為止 墓死所荆棘

惡木斧以斯析之梅味酸人哀則鼻酸鵲惡鳥詳味

辭旨則毛詩序言刺佗情狀著矣序又曰陳佗無良
師傅以至於不義惡加於萬民焉蓋罪師傅詩辭有
欲殺所任邪惡之人之意斧以斯之直欲殺之欲殺
所任之人則佗之罪狀亦著矣夫也不良指所任也
序謂之師傅國人皆知其不良君豈不知之知之而
不已乃任用之誰昔然矣言昔始用之者誰也此亦
默譏先君不能去小人使傳佗致此禍也作此歌詩
以告之訊告之也予我也予告之而不顧終用不良

之夫則禍敗之至也必矣顛倒禍敗之謂也顛倒時
則思予之言矣後佗益長惡數往蔡淫果為三弟及
蔡人所共殺 補音思予演女切顏師古糾繆正俗
曰予當讀如與不當讀如余詩或敢侮予將伯助予
女轉棄予楚辭目眇眇以愁予何壽夭今在予皆無
余音鄭康成曲禮注云余予古今字非也未詳

防有鵲巢邛有旨茗誰侮予美心焉忉忉中唐有甕邛
有旨鵲誰侮予美心焉惕惕

毛詩序曰憂讒賊也宣公多信讒君子憂懼焉毛傳
曰防邑也邛邱也茗草也併張誑也鄭箋云旨美也
爾雅釋宮云瓠甌謂之甍郭璞曰甌甑也釋宮云廟
中路謂之唐孫炎引詩中唐有甍釋草云鷓鴣綴郭璞
云小草有雜色似綴歐陽曰讒言惑人非一言一日
之致必由積累而成如鵲巢漸積構成之爾茗草多
矣其華一色讒夫之多通為一黨似之廟中之唐以
甍甍砌今俗以巧言設詐次第而至者謂之排砌此

唐覽之喻也。鵠草雜色成文，讒言排砌甚美，足以動人心，似之義同。貝錦，詩人之所美者，吾君也。故曰：誰為讒言以侮誑吾君乎？予心忉忉，其憂也。惕惕其懼也。讒言行則小人進，君子退，國亂且敗矣。兩言旨者，讒言固令人美聽也。唐風葛生亦曰：予美則婦以夫為美，此則臣以君為美。宣公有嬖姬生子，款欲立之，終於殺太子，必有讒者。

月出皎兮，佼人僚兮。舒窈窕兮，勞心悄兮。月出皓兮，佼

人憫兮舒懷受兮勞心慍兮月出照兮佼人燎兮舒天
紹兮勞心慘兮

毛詩序曰月出刺好色也皎者光之白歟皓者月愈
上而光愈盛歟佼姣同美也僚白歟憫清歟燎潔歟當
月出之時見佼人之僚白人之肌體之白得月而尤
白好色者悅之故其窈糾之情舒焉而不可遽得故
勞心悄然窈者思之深遠也糾愁結也憂憂也入心
之深也王氏曰慍言不安而騷動朱曰天紹糾緊之

意 補音云古書靜躁或作𨔵史記摻板樨索隱音
操吳谷朗碑詞名梟豹產勲齊往蹤又以參為梟二
字古蓋通用說文燥愁不安也慘毒也唐韻燥采老
切慘七感切此詩音義皆當作燥變而為慘者傳寫
之訛或二字互用故以慘為燥開元五經文字書慘
為燥又云憂而不樂也呂曰此詩用字聲牙意者其
方言歟佼人之稱雖言美好而非善之也乃詩人之
鄙辭序曰刺好色是也

胡為乎株林從夏南匪適株林從夏南駕我乘馬說于
株野乘我乘駒朝食于株

毛詩序曰株林刺靈公也淫乎夏姬驅馳而往朝夕
不休息焉毛傳曰株林夏氏邑楚殺徵舒左傳謂之
戮夏南靈公實從南之母淫而曰從夏南者託辭於
夏南隱惡也說舍也徵舒字子南車已駕則有司請
所之公曰適株林詩人曰匪適株林從夏南爾豈但
詩人國人皆云乘駒易韻爾毛傳言大夫未安雖有

其事詩辭未必及此

彼澤之陂有蒲與荷有美一人傷如之何寤寐無為涕
泗滂沱彼澤之陂有蒲與蘭有美一人碩大且卷寤寐
無為中心悁悁彼澤之陂有蒲菡萏有美一人碩大且
儼寤寐無為輾轉伏枕

菡戶感切菡大感反枕補音知輦切釋名枕檢也所
以檢頤也周易險以枕入于坎窞亦以枕韻窞補音
此切未安詩固自有微叶而不切者縱此切叶則宜

占斂切乃今音之微轉若知輦切則差甚矣 是詩
念正人至潔至美知其大患且及憂之痛之至於涕
泗滂沱也攷之於史則泄冶諫靈公君臣淫亂公告
孔寧儀行父二子請殺之公弗禁之時也而毛傳序
曰刺時也言靈公淫於其國男女相說憂思感傷焉
諸儒遂謂此有美一人為婦人誤矣攷他詩簡兮西
方美人彼美人兮謂美德之人也靜女美人之貽亦
謂美德不謂其色野有蔓草有美一人亦謂美德之

士孔子嘗咏以稱程子汾沮洳美無度美如英美如玉亦
謂大夫況此詩所謂碩大且卷碩大且儼豈女子之
容耶漢史謂衛宏作毛詩序屢攷衛序差謬不一蒲
與荷生于水中至潔矣君臣俱淫餘皆從靡獨泄治
直諫此固國人之所美所愛也故曰有美一人蓋比
德於蒲荷詩人曰美則美矣傷如之何往往或聞靈
公與孔寧儀行父怒將殺之不正言而惟曰傷不敢
必也亦愛賢者不忍言殺也然審之其情狀將至於

殺故哀痛日夜一無所為百為俱廢至于涕泗滂沱
毛傳曰自目曰涕自鼻曰泗諸儒不易其說而今俗
亦曰鼻涕毛傳謂蘭蘭而蘭未嘗生於澤陂故鄭改
為蓮然改字未安豈荷葉亦名為蘭歟荷葉與華率
相間豈以是得名歟荷者芙蕖之總名釋草云荷芙
蕖其葉蓮其華菡萏其實蓮蘭其蓮之異名歟卷者
其背豐隆外形卷彎歟碩大卷儼皆言德容歟輾轉
亦見關雎

檜

羔裘逍遙狐裘以朝豈不爾思勞心忉忉羔裘翱翔狐
裘在堂豈不爾思我心憂傷羔裘如膏日出有曜豈不
爾思中心是悼

毛詩序曰羔裘大夫以道去其君也國小而迫君不
用道好潔其衣服逍遙遊晏而不能自強于政治故
作是詩也鄭箋云諸侯之朝服緇衣羔裘大蜡而息
民則有黃衣狐裘今以朝服燕祭服朝言如膏有曜

則好潔其衣服益著矣言豈不爾思則去國之情見矣

庶見素冠兮棘人樂樂兮勞心博博兮庶見素衣兮我心傷悲兮聊與子同歸兮庶見素韞兮我心蘊結兮聊與子如一兮

毛詩序曰素冠刺不能三年也庶見二字宛然有刺其不能三年之意禮既祥而縞冠素紕傷時服未終而遽釋曰庶見其素冠猶之可也毛傳曰棘急也樂

藥瘠貌哀者急遽異乎常人之舒徐也庶見棘人之
藥藥而不可得也故勞心博博而傷悼之傷風俗之
薄而亂亡之將至也詩人與同志者偕行見不能三
年者相與傷悲曰且與子同歸乎素韞本常服非喪
服傷彼色服故曰得見其素韞猶之可也彼色服者
蓋韎韐爵韞矣如一同志也歎彼俗之不可革曰聊
與子如一而已矣聊猶且也禮皮弁服素韞太古未
有衣裳惟以皮蔽膝後聖雖制衣裳而不忘本始名

隰有萋楚猗猗其枝天之沃沃樂子之無知隰有萋楚
猗猗其華天之沃沃樂子之無家隰有萋楚猗猗其實
天之沃沃樂子之無室

是詩大夫不樂夫君之淫恣而思其未有情慾之時
也而毛詩序曰國人疾其君之淫恣而思其無情慾
者也則微差釋草云萋楚鉞弋名羊桃郭云今年桃
也或曰鬼桃葉似桃葉白子似桃陸璣云今年桃是
也華紫赤色其枝莖弱過一丈引蔓于草上萋楚未

長則蔓不延蔓延有縱慾之象如君長則情慾蔓延
不已首章曰樂子之無知二章曰樂子之無家三章
曰樂子之無室室家夫婦之道樂子未有知時未有
室家時未有情慾之時則知今淫恣詩人之所不樂
也天好也沃沃盛也人心自善人心自神人心即道
故曰道心雖長而知男女之道生於正情不動私意
則歸妹天地之大義也自無淫慾如天地絪縕如水
鑑中之影象

匪風發兮匪車揭兮顧瞻周道中心怛兮匪風飄兮匪
車漂兮顧瞻周道中心弔兮誰能亨魚漑之釜鬻誰將
西歸懷之好音

飄補音匹妙切曹植感節賦遠飄與笑字照字叶漂
匹遙反亨普庚反鬻音尋揭毛詩作偈前漢王吉引
詩作揭 匪風非平常之風也匪車非平常之車也
疾風發發車疾如揭檜國之政急疾如此故詩人之
心怛而驚而思周道之和平也東周無足云矣所思

者西周文武之道故顧瞻西周之道途而益感傷焉
嘯疾車之音也弔哀傷也毛詩序曰匪風思周道也
漑滌也鬻甑也魚亦可甑蒸朱曰誰能亨魚我則願
為之漑其釜鬻誰將西歸我則願慰之以好音以見
思之之甚言有能興周道者則已將歸之也程曰亂
極思治人情所然風者天之動以興上政車者人所
為以興民俗天氣順則風時上德修則政舉法制備
則車成政教衰則民僻故以興上下焉

按朱曰以下
原本缺今補

入

欽定四庫全書

慈湖詩傳卷十

宋 楊簡 撰

曹

蜉蝣之羽衣裳楚楚心之憂矣於我歸處蜉蝣之翼采
采衣服心之憂矣於我歸息蜉蝣握閭麻衣如雪心之
憂矣於我歸說

爾雅釋蟲云蜉蝣渠畧郭云身狹而長有角黃黑色
叢生糞土中朝生暮死毛詩序曰昭公好奢而任小

人夫國之存亡治亂由所任之賢否今曹君任羣小
小人以類而進如蜉蝣之多又君臣昏愚無所用其
心惟奢潔其衣服浮游度日不知亂亡之將至如蜉
蝣朝生暮死其卑汙不足比數亦如蜉蝣微蟲生於
糞土而衣裳侈潔亦如蜉蝣之有羽蓋曰羣小之衣
服特如蜉蝣羽耳楚楚猶濟濟也采采采色之備也
掘閱者蜉蝣掘糞土而出覩陽明閱有觀覩之義喻
羣小識見卑汙之甚也羣小方蜉蝣自喜而事君者

心憂馬憂國之亂亡也於我歸處者亦猶素冠之詩
言我心傷悲兮聊與子同歸兮蓋詩人與同志者偕
行途中遇衣裳楚楚者因動心憂懼輟行而歸曰歸
於我室而處息乎歸於我室而說此話乎惟同志故
相親也而毛詩序總曰刺奢也不盡事情又曰國小
而迫無法以自守皆贅說豈以國小而迫如蜉蝣之
穴乎湯以七十里朝諸侯有天下何患乎小

彼侯人兮何戈與祿彼其之子三百赤芾維鷩在梁不

濡其翼彼其之子不稱其服維鷦在梁不濡其味彼其
之子不遂其媾薈兮蔚兮南山朝躋婉兮嬾兮季女斯
飢

是詩傷賢者失所羣小得志至於淫縱而棄薄其正
室也夏官序云候人上士六人下士十有二人史六
人徒百有二十人其職云各掌其方之道治與其禁
令以設候人及歸送之于境諸侯之禮降無上士小
國殆下士為長所謂荷戈與袂之候人其徒耳考工

記廬人云戈祕長六尺有六寸祿長尋有四尺說文
云祿父也玉藻云一命緼茀黜珩再命赤茀葱珩茀
韞也大夫以上赤茀乘軒彼候人兮意指賢者而荷
戈與祿迎送賓客於道路彼其之子意指小人乃服
赤茀者三百人雖大國無是也其寵用小人蕩然無
度一至於此鷦鷯喙長尺餘領下胡大如數升囊羣
飛入水食魚今也在梁不濡其翼味長如此而亦不
濡是當食魚而不得食魚喻賢者宜得祿而不得祿

按樓鑰云歐陽氏曰此鵜當居泥水中以自求魚而食今乃邈然高處魚梁之上竊人之魚以食而得不得濡其翼味如彼小人竊祿于高位而不稱其服也鵜不當以喻賢者不若歐陽氏之說為長

彼小人乃不稱其服小人不宜赤芾而赤芾賢者貧無以

為食彼小人乃富貴縱肆好色淫恣而棄其婦媾婚

媾也

按鑰又曰毛氏曰媾孕也張氏曰不遂其媾不稱其寵待也今人謂遂意亦曰稱意世俗

常情窮飢則無暇於色厭飫則放逸而好色董曰蒼

集注作媾蔚文也南山朝躋蝦蟇也人莫敢指者乃

陰陽交感不正之氣南山喻在高位朝躋喻淫縱淫

縱者

按原本脫下澤縱二字今校補

惟其意之所溺固有其妻雖婉孌

而自不說者如衛莊姜雖美而不見荅蓋不樂靜正

而放於情慾季女者年少之妻以其未嘗相親如不

為婦也故曰季女不悅之則失所至於斯飢矣

按又曰

張氏詩曰林木南山蒼蔚時工斤樵斧競朝隣舉知趨利青冥上不念幽居季女飢陳氏曰壯者趨利于

山則弱者餒窮于室小人肆志于上則君子困窮于下張陳二說雖未必盡得詩人之意然其說猶雅馴

今為一媾字一媾字又婉孌季女遂生此說然朝隣實非蝦蟇也彼蝦蟇之詩首章曰蝦蟇在東莫之敗

指故次章曰朝隣于西崇朝其雨至今朝日在東則虹見于西夕日在西則虹出于東鮮有見于南者且

此詩初不言虹而徑以朝隤為蝓螻則不可既曰季女如有齊季女而曰如不為婦亦覺費辭若以南山喻高位朝隤喻淫縱亦不成詩語宜有以更之毛詩序曰候人刺近小人也共公遠君子而好近小人焉不盡詩情

鵲鳩在桑其子七兮淑人君子其儀一兮其儀一兮心如結兮鵲鳩在桑其子在梅淑人君子其帶伊緜其帶伊緜其弁伊騏鵲鳩在桑其子在棘淑人君子其儀不忒其儀不忒正是四國鵲鳩在桑其子在榛淑人君子正是國人正是國人胡不萬年

鴈鳩釋見鵲巢毛傳曰鴈鳩之養其子朝從上下暮
從下上平均如一董曰崔靈恩集注作其義一兮一
而不變如結之不解毛傳曰飛在梅也孔疏曰養之
長大而飛鴈鳩常言在桑其子每章異本言母常不
移也鄭箋云其帶伊絲謂大帶也言此帶弁者刺不
稱其服毛傳曰騏騏文也弁皮弁也孔疏云皮弁常
服也馬之青黑者謂之騏此謂弁色如騏如騏馬之
文也顧命云四人綦弁鄭元云青黑曰綦王肅云赤

黑孔安國云鹿子皮顧命馬本作騏弁云青黑色鄭師馬融故祖其說爾雅釋畜云馬屬獨不言騏其雜色之馬總謂之騏故無定名歟其間駢白駁黃白驤驪白鵠蒼白騅丹白駮之類則又其專名歟其總稱雜色則曰騏歟毛傳曰騏騏文也雜則成文歟孔安國曰騏文鹿子皮蓋本於先儒謂皮并用白鹿皮又因毛傳有騏文之義世俗鹿子皮必有文故合而為是說然古者不用難得之物安知不用白羊之皮乎

況先王不殺胎則用鹿子皮非先王之心馬鄭青黑
之說蓋以爵弁色如雀頭赤色則異色而相類者其
有青黑歟故王肅又意之為赤黑亦禮飾元纁之類
歟皆無經據今姑從毛傳騏之文義又合爾雅騏無
定名之義尚書四人綦弁皆士其以士賤故所服皮
弁不得用純白惟可用雜色之皮歟綦騏通用歟士
冠禮元裳黃裳雜裳可也則士用雜色皮弁於義亦
通先王制禮大抵上質而下文胡不萬年者詩人思

古之淑人君子胡不萬年壽考至今傷今小人用事
不一不正而思古使古之淑人君子至于今尚存則
小人不得而進矣毛詩序曰鵲鳩刺不一也在位無
君子用心之不一也 補音萬年禰因切太元務首

次五無益人也次六利當年也楚辭哀時命生天地
之若過兮忽爛熳而無成願一見陽春之白日兮恐
不終乎永年漢書序傳封禪郊祀登秩百神協律改
正饗茲永年

按原本
四句脫

又西都賦年與麟叶又靈臺詩

年與神叶春秋公子年夫老氏穀梁皆作佞佞平聲
夏侯湛疑佞與傾為韻

冽彼下泉浸彼苞稂
愠我寤嘆念彼周京
冽彼下泉浸彼苞蕭
愠我寤嘆念彼京周
冽彼下泉浸彼苞蕭
愠我寤嘆念彼京周
之

釋草云稂童梁陸璣云禾黍為穗而不成則疑然謂
之童梁魯語曰馬籛不過稂莠童幼叢生曰苞童梁

不實有下民飢虐之象苞稂寒泉浸之尤見無陽和之氣列彼下泉虐政似之今田家謂田冷者不善以陰氣太盛故也故我愾然寤嘆思念周道蕭香草賢者似之亦失所著可以筮通神明知吉凶知者似之亦失所士民皆失其所故憂而思明王賢伯雨者和順所成黍苗得陰雨則如膏毛傳曰郇伯郇侯也鄭箋云郇侯文王之子為州伯有治諸侯之功言上有明王又有郇伯以勞來之則士民如蒙膏雨之降異

乎下泉之列矣泉出地下曰下泉毛詩序曰下泉思
治也曹人病共公侵刻下民不得其所憂而思明王
賢伯也

幽

七月流火九月授衣一之日飢發二之日栗烈無衣無
褐何以卒歲三之日于耜四之日舉趾同我婦子饁彼
南畝田畯至喜七月流火九月授衣春日載陽有鳴倉
庚女執懿筐遵彼微行爰求柔桑春日遲遲采繁祁祁

女心傷悲殆及公子同歸七月流火八月萑葦蠶月條
桑取彼斧斨以伐遠揚猗彼女桑七月鳴鵙八月載績
載玄載黃我朱孔陽為公子裳四月秀萼五月鳴蜩八
月其穫十月隕穽一之日于貉取彼狐狸為公子裘二
之日其同載績武功言私其縱獻豸于公五月斯螽動
股六月莎雞振羽七月在野八月在宇九月在戶十月
蟋蟀入我牀下穹窒熏鼠塞向瑾戶嗟我婦子曰為改
歲入此室處六月食鬱及薺七月亨葵及菽八月剥棗

十月穫稻為此春酒以介眉壽七月食瓜八月斷壺九月叔苴采荼薪樗食我農夫九月築場圃十月納禾稼黍稷重穋禾麻菽麥嗟我農夫我稼既同上入執宮功晝爾于茅宵爾索綯亟其乘屋其始播百穀二之日鑿冰沖沖三之日納于凌陰四之日其蚤獻羔祭韭九月肅霜十月淅場朋酒斯饗曰殺羔羊躋彼公堂稱彼兕觥萬壽無疆

火虎隗反威音必發補音方吠切說文廢以發得聲

壹發五豝獸爾發功徐邈皆讀如廢劉伯莊史記音

孔子世家發中權發音廢平原君傳而未發亦云十

九人輕笑之未能即廢太元應首次七惡敗類也次

八應其發也張衡東京賦奉車既引先輅乃發鸞旗

皮軒通帛蒨旆桓麟七說按原本桓誤柏今改騎不失蹤滿不虛

發彈輕翼於高冥按原本訛作真窮疾足於方外栗烈力制

切古厲山氏亦作烈揚雄校獵賦元冬季月天地隆

烈萬物權輿於內徂落於外張衡西京賦雨雪飄飄

冰雪慘烈百卉具零剛蟲搏鷙鎰炎轍反峻音俊火
補音虎隗切說文火燬也物入則皆毀壞也方言燬
火也呼隗切郭璞曰楚轉語也猶齊言焜火也汝墳
王室如燬孫炎曰方言有輕重故以火為燬也按易
林同人之漸曰魁行搖尾逐雲吹火泰之旅曰從風
吹火牽騏驎尾需之大有曰乘舟渡濟載永逢火剝
之坤曰從風放火荻芝俱死未濟之漸曰穿匏挹水
篝鉄然火萑戶官反斨也羊反猗於宜反鵙圭覓反

莎素何反子補音讀與戶叶易林師之泰隨之睽皆
子與女叶夬之萃子與主叶同人之家人子與與叶
同人之恒子與所叶太元去首子與主叶韓非曰慈
母有敗子嚴家無格虜瑾音覲壽補音殖酉切顏
師古糾繆正俗或曰年壽之字北人讀為受音南
人讀授音何者為是荅曰兩音皆通南山有臺遐
不眉壽此則言受嵇康詩頤神養壽散髮巖岫
此則音授也按張衡東京賦三壽與國叟叶苟

卿蠶賦身女好而頭馬首者與屢化而不壽者與

有父母而無牝牡者與王儉釋奠詩咨此含生躋

彼仁壽淳移雅缺歷茲長久梁元帝元覽賦惟天

縱於副后踰啟誦而為首既論儒而肅成復斷獄

於長壽瓜

按原本
脫此字

簡按衛風木瓜補音攻乎切引

證甚多饗補音虛良切漢房中歌嘉薦芳矣告靈

饗矣告靈既饗德音孔臧郊祀歌闕流離抑不祥

賓百僚山河饗顏師古皆讀如鄉是詩大旨已

見幽釋謂邠之始國當是時所紀時用夏正七月
流火建申之月也火心星也堯典曰日永星火或
曰星火大火之次也心星正居大火之次故心星
亦名火毛傳曰流下也九月霜始降婦功成可以
授衣矣堯典火星昏中於南方以正仲夏則至六
月而火星漸流至七月則西流之狀昭昭矣自堯
至后稷之曾孫公劉居邠歷年未為甚久天運未
大變二千年而至秦之月令則季夏昏火星中則

知日歲行周天之度不盡積二千年而後一月矣
流者星隨天輪轉而下也日益東行星益西流心
經星實不動隨天西轉故曰西流夫既叙邠事用
夏正矣而又曰一之日二之日三之日四之日用
周正何也以今驗昔則事狀可考也然亦不明言
正月二月三月四月以明其實叙豳事也感發者
寒風勁發萬籟盡鳴如吹感策也野俗有語籬
端吹感策謂烈風吹籬端之虛管作聲也感策羌

人所吹角邠亦西羌之地栗烈者丑月寒氣益烈

人股戰栗也

按樓鑰曰毛氏曰威發風寒也栗烈氣寒也王氏曰風而寒尚非其至也

無風而寒于是為至只如此說足矣威栗一名悲栗一名笳管竈茲之樂也其聲悲栗羌人吹之以

驚中國之馬後世之樂始有譜其音以為眾籟之首周時安得有此俗語尤不足取股戰而栗漢人

始有此語毛傳謂栗烈氣寒也其以是歟鄭箋云褐毛

布也夏小正曰正月農緯厥耒緯束也束其耒云

爾者用是見君子之亦有耒也耒與耜而為一將

以用之也毛傳曰邠地晚寒于耜始修耒耜也月

令季冬命農修耒耜孟春天子躬耕帝藉毛傳曰四
之日民無不舉足而耕矣夏小正於正月已初服于
公田則四之日即夏之二月咸舉趾而服其私田矣
我婦我子同來致餉於南畝畝獨曰南者姑舉一而
言也爾雅釋言曰畯農夫也孫炎曰農夫田官也毛
傳曰田大夫也小雅甫田云田畯至喜鄭箋云田畯
司嗇今之嗇夫也農者多以天星為候故三言七月
流火況七月正是西成之時農事於此至重兩言九

月授衣衣食最其急者鄭箋云載則也陽溫也毛傳
曰倉庚離黃也懿筐深筐也微行墻下徑也五畝之
宅樹之以桑懿筐者筐之美者懿美也謂竹工之精
細者蠶始生桑亦始生而柔孔疏云倉庚一名離黃
即葛覃黃鳥是也毛傳繫白蒿也所以生蠶祁祁衆
多也山陰陸氏曰今洗蠶種尚用蒿釋草云繫皓蒿
郭云白蒿也婦人女子易於感傷而況於春時其羣
行采繫時見其有相語傷悲之態君猶躬耕公子宜

親農事公子之歸時差早女子之歸次之故曰殆及
公子同歸衆農則終日矣其政事有節叙不亂如此
毛傳曰亂為萑葦為葦豫儲萑葦可以為曲也月令
季春具曲植筥筐注云曲薄也養蠶器也陸璣云亂
或謂之荻至秋堅成則謂之萑郭云蘆葦也鄭箋云
條桑枝落之采其葉也毛傳曰斨方釜也破斧傳云
隋釜曰斧方釜曰斨遠條揚起手所不及者則伐之
乃采其葉猗語辭也書云斷斷猗大學作斷斷兮伐

檀河水清且漣漪亦語辭也猗彼女桑柔穉之桑也
先取其大次取其小事情之常也毛傳曰鷦伯勞也
載績絲事畢而麻事起矣元黑而有赤也朱深纁也
陽明也祭服元衣纁裳鄭箋云伯勞鳴將寒之候五
月則鳴邠地晚寒鳥物之候從其氣焉不曰為君裳
而曰為公子裳者按國語王后親織元統公侯之夫
人加之以紃縠卿之內子為大帶命婦成祭服此魯
公父文伯之母所言周禮則然七月之詩乃序邠事

邠用夏禮又邠在戎狄之間為禮益簡朴則君夫人
親織其君之服故邠人之所供則為公子服鯁毛傳
曰萋草也不榮而實曰秀爾雅釋草云不榮而實者
謂之秀而論語曰秀而不實者有矣夫鄭箋云夏小
正四月王萇秀萋其是乎本草云萇生田中葉青刺
人有實七月采釋蟲云蛭蛭蛭蛭方方言云楚謂之
蛭宋衛之間謂之蟪蛭陳鄭謂之蛭蛭秦晉謂之蟬
孔疏曰釋蟲又云蛭寒蛭郭云小而青赤與此鳴蛭

不同夏小正云五月蟬鳴七月寒蟬鳴是其異也
穫穫禾也穰搞也隕墜也亦見鄭風穰兮鄭箋云于
貉往搏貉以自為裘也狐狸以共尊者其同者君臣
及民同習兵因出田也毛傳曰績繼也豕一歲曰縱
三歲曰豮大獸公之小獸私之釋蟲云斯螽蚣蝻蘇
曰即螽斯也釋蟲云翰天鷄郭云小蟲黑身赤頭一
名莎鷄又曰樗鷄李巡曰一名酸鷄陸璣曰莎鷄如
蝗而斑色毛翅數重其翅正赤爾雅疏云斯螽一名

蚣蝑一名春黍蝗類也長而青長角長股股鳴者也
五月中以兩股相切作聲聞數十步者是也釋文曰
屋四垂為宇鄭箋云自七月在野至十月入我牀下
皆謂蟋蟀也不首言蟋蟀者人縱言有如此者意自
相應人亦自曉毛傳曰穹窮室塞也向北出牖也墜
塗也庶人簞戶孔疏云簞戶以荆竹織門通風故泥
之也穹室其室之孔穴熏鼠令出其窟士虞禮云祝
啟牖嚮牖一名也朱曰塞向以當北風嗟嘆也其長

老嘆而語其婦子曰我婦我子今歲將窮而改矣入
此室而處乎此家人常談詩陳叙及此以見親愛至
情久勞將休之狀本草云鬱一名雀李一名車下李
毛傳曰萁萁也剥擊也眉壽毫壽也孔疏云晉宮
閣銘云華林園中有車下李三百一十四株萁李一
株車下李即鬱按原本
五字脫萁李即萁二者相類李曰葵
可茹公儀為魯相所拔者是也朱曰菽豆也十月穫
稻晚稻也十月為春酒三月而酒始成也漢之中山

酒冬釀接夏而成則十月為春酒猶未為久也今俗
為酒及月而已蓋古者未知以罍囊壓酒至唐猶然
故必待久而後清鄭箋云介助也眉生毫毛為壽考
之相毛傳曰壺瓠也叔拾也苴麻子也樗惡木也瓠
至八月堅成則斷截之可以為壺壺圓器也壺瓠音
義同說文亦曰叔拾也鄭箋云乾茶之菜苴茶之蓄
供以常食食我農夫者猶曰給我家人也今農夫猶
自稱曰農家場圃同地毛傳曰春夏為圃秋冬為場

後熟曰重先熟曰糴箋云納內也治於場而內之固
倉也糴粟也天官內宰詔王后帥六宮之人而生種
陸之種而獻之于王鄭司農云先種後熟謂之種後
種先熟謂之陸釋文云重作種說文云禾邊作重是
重糴之字禾邊作童是種藝之字今人亂之已久記
勝之種植書于黍稷稻粱之外有禾云即是粟此說
盖起於董仲舒云禾是粟苗夫禾者穀粟之總稱種
陸亦總言諸禾先熟後熟下文總言諸禾及胡麻蕒

麻及豆麥何必於稻粱之外定指粟為禾此既言黍稷則所謂禾者謂稻秔秫諸禾歟董仲舒所謂粟苗為禾者以粟又為黍稷稻粱之通稱故云農民固以粟為禾然亦以稻為禾稻種甚多陶隱居從汜說以禾為穀之數亦陋矣或以稷為稭稭粟同類農人相謂曰我稼既皆內于囷倉則可以上入都邑執公宮之事矣同皆也范氏亦曰宮功公室之役也箋云爾女也毛傳曰宵夜也綯絞也箋云女當晝取茅歸夜

作絞索以待時用亟急也急乘屋者覆蓋之也所乘者在下故曰乘龍乘舟乘車今升屋而治之則屋在下矣故曰乘所以乘屋不敢緩者以播穀之事又將始矣民事之勤勞罕暇如此鑿氷之時擇沖和之日

慮寒氣之傷人也

按鑰又曰毛氏曰沖沖鑿氷之意孔氏曰沖沖非貌非聲故云鑿氷

之意左傳曰深山窮谷涸陰沍寒于是取之幽尤寒盛冬安得有沖和之日不如只從毛說

幽公

愛民如此毛傳曰凌陰氷室也孔疏云幽地晚寒故可夏正月藏氷案天官凌人正歲十有二月令斬氷

三其凌程曰其蚤用之於獻羔祭韭時夏頒冰是其
後用時也月令仲夏天子乃獻羔開冰先薦寢廟祭
韭者以韭新出故薦之毛傳曰滌埽也兩樽曰朋幽
在我狄之間君民之分不嚴故可以朋酒羔羊躋公
堂稱兕觥而為豳公之壽

鴟鴞鴟鴞既取我子無毀我室恩斯勤斯鬻子之閔斯
迨天之未陰雨徹彼桑土綢繆牖戶今女下民或敢侮
予予手拮据予所將荼予所蓄租予口卒瘁曰予未有

室家子羽譙譙子尾脩脩子室翹翹風雨所漂搖子維
音曉曉

詩旨已見邠釋爾雅釋鳥云鵽鵽鵽郭曰鵽類爾
雅繼云狂茅鵽怪鵽鵽釋曰此別鵽類也大雅瞻
印云為臬為鵽陸璣云鵽大如斑鵽綠色惡聲之鳥
也入人家凶賈誼所賦鵽鳥是也陳風墓門云有鵽
萃止此詩喻鳥之愛其子與巢者呼鵽鵽而告之鄭
箋云室猶巢也朱曰鬻此子誠可憫憐今既取之其

為毒甚矣況又毀我室耶程曰鵲喻為惡者子喻
管蔡室喻王室毛傳曰迨及也方言云東齊謂根曰
杜董曰石經作桑杜朱曰牖者巢之通氣處戶其出
入處也毛傳曰拮据擿揭也按揭原本誤作
拘下同今改正孔疏曰
說文云擿持也擿揭謂以手爪揭持也毛傳曰荼萑
莒也孔疏曰蘆為萑萑莒謂蘆之秀穗也朱曰將取
也荼莒華可藉巢者程曰蓄積租取也王曰與租賦
之租同毛傳曰瘡病也手病口病故能免乎大鳥之

難

按大典脫此八字今校補

箋云我作之至苦如是者曰我未有

室家之故毛傳曰譙譙殺也脩脩敝也翹翹危也譙

譙憔悴也脩脩勞敝而毛不密比風吹之脩脩也大

亂如風雨漂搖予室予維末如之何音嘒嘒而已矣

夫周公欲成王於亂未作如何其綢繆牖戶也豈惟

欲其勤於政事而已耶政事雖勤君心易惑流言終

不已亂終作也周公欲成王勤於學學而德性明賢

否判流言何自而作亂何自起乎故孔子曰為此詩

者其知道乎

我徂東山惓惓不歸我來自東零雨其濛我東曰歸我心西悲制彼裳衣勿士行枚蝟蝟者蝟烝在桑野敦彼獨宿亦在車下我徂東山惓惓不歸我來自東零雨其濛果臝之實亦施于宇伊威在室蠨蛸在戶町疇鹿場熠燿宵行不可畏也伊可懷也我徂東山惓惓不歸我來自東零雨其濛鸛鳴于垤婦嘆于室洒掃穹窒我征聿至有敦瓜苦烝在栗薪自我不見于今三

年我徂東山惓惓不歸我來自東零雨其濛倉庚于飛
熠燿其羽之子于歸皇駁其馬親結其縈九十其儀其
新孔嘉其舊如之何

栗韓詩作漻力菊反長茂也或曰衆也毛詩作栗
毛詩序曰周公東征三年而歸勞歸士此語得
之而繼曰大夫美之故作是詩也詳攷詩情不合
又曰一章言其完也二章言其思也三章言其室
家之望女也四章樂男女之得及時也君子之於

人序其情而閔其勞所以說也說以使民民忘其死
其唯東山乎詳觀四章序情閔勞足盡不畧而每章
別而言之則有所不盡首章雖見其不死於征役完
而歸而非專言其完也四章皆言其思奚獨二章為
然民忘其死乃詩外之義是詩其歌以勞歸士乎序
情閔勞周公之至情豈章別解釋之所能盡衛宏作
序詎能知聖人之心聖人之心即人之心也人心即道故
曰道心人惟不自知其心故不知聖人之心離心生意

始失其道此諸儒所以紛紛雜雜而正牆面孰知夫
作歌勞歸士序情閔勞如此曲折乃道心之變化如
四時之錯行也苟微害夫人之道心周公必不可用
也程氏曰東山所在之地也毛傳曰惓惓言久也潒
雨貌士事也尚書康誥云見士於周注亦以士為事
周頌敬之陟降厥士桓保有厥士皆謂事古士事通
用其以音同歟大司馬大閱銜枚而進王朝作是詩
以序歸士之情凡言我謂歸士之已也以周公大聖

將衆士以東征民忘其勞矣未必有惓惓不歸之念也而王朝作詩以序其情自為是辭也此其所以盡人之情也及自東來歸又道塗遇濛然之零雨零落也其勞苦誠可念其歸士必不作勞苦之念而上之人序其情閔其勞故言及此也每章首必及此其閔勞不已之情可見我東曰歸又再起意我自東而初聞曰歸也我心感動念家之情而西悲此人之至情非有所怨苦於上也自悲耳寄音於室家曰若制彼

衣裳今歸矣勿事行枚言勿為銜枚之具來也言今
無用也行而進戰乃銜枚故曰行枚大司馬注云枚
如箸銜之有繮結于項中毛傳曰蠋桑蟲也烝有升
義有衆義井中蟲曰蛭則此蛭蛭謂蠋之狀光潔如
蛭也野有桑林有蠋烝焉歸塗所覩感時物而興懷
也歸士宿車下軍政士不可離伍也曰獨宿者閔其
未有室家之樂故云也敦敦然宿卧之狀毛傳曰果
羸枯樓也伊威委黍也蠋蛭長跣也町疇鹿迹也熠

耀燐也燐螢火也施于宇蔓延于屋上也淮南子云
久血為燐許慎云謂兵死之血為鬼火孔疏引此云
燐者鬼火之名非螢火也下文曰不可畏也則謂熠
耀為鬼火之稱陳思王螢火論謂熠耀宵行為螢火
非鬼火亦未安田野多燐不足多怪郭璞注釋蟲云
伊威鼠婦之別名本草云鼠婦一名負蟠一名蚘蟻
一名蜚蠊一名鼠負言鼠背多負此蟲今作婦字似
乖理一名鼠姑爾雅蟠鼠負是也多在甕器底及土

坎中常著鼠背故名之也如菴耳名羊負菴也爾雅
釋蟲前云蟠鼠負後別行蚺蜥委黍似二蟲然爾雅
差誤不一此其誤耳長跣小蜘蛛長脚者俗呼為蟪
子壯夫不在家其家荒蕪形容其狀如前末言熠燿
燐鬼火故曰不可畏也乃可懷思也思復見夜行之
燐火與夫果羸施宇伊威蟠蛸町疐鹿迹而未得也
毛傳曰埴蟻塚也將陰則穴處先知之鸛好水長鳴
而喜也孔疏曰將雨則蟻避濕而上塚

按以上二十
字原本脫今

按鶴鳴于垤詩意與零雨其濛同婦嘆于室聞其夫

將歸感傷而嘆也鄉人樓尚書云山東蟻塚有極高

大如塚墓然行人以雨為苦婦嘆念其勞也

按樓鑰云毛公

齊人自知之解不甚詳孔疏亦未明皆不見于垤之義惟胡德輝蒼梧雜志言之最明云新經傳鶴鳴于垤謂垤為邱垤非蟻塚蓋荆公未嘗到山東蟻冢有極高大者如塚墓然每天將雨則鶴集蟻垤而鳴蟻知雨鶴喜雨以其類也方說得于垤字分曉正以雨將作故婦嘆于室如殷其雷之意正念其勞也若我征聿至自在下句婦嘆于室意總于上孟子所謂邱垤以是知邱是自然高處垤乃蟻塚上土共盤馬于蟻封亦謂此也按此則蟻塚之洒灑埽拚也穹窮說乃樓引胡氏語非樓氏說也

室塞其鼠穴所以然者謂我征役今歸且至矣我者
歸士自謂也歎婦之夫也瓜之苦者可以為器其狀
敦然其圓烝延蓼薪之上蓼蕭蓼莪皆言其盛蓼蓼
同士歸而顧其家苦瓜延于薪曰自我不見此瓜三
年矣推盡歸士情狀至於此可謂閔勞之至有蠟在
桑有苦瓜在薪時未寒肅晴暄之日倉庚猶飛其羽
熠燿光明女之嫁曰歸易曰歸妹爾雅之釋馬屬駟
白馭黃白馭孫炎曰駟赤色也毛傳曰縞婦人之褱

也母戒女施衿結帨九十其儀言多儀也釋器云婦人之褱謂之縞縞綌也孫炎曰褱帨巾也郭璞云即今之香纓也褱邪交落帶繫於體因名為褱綌繫也孔甚也其新昏者甚嘉矣其舊昏如之何序情閔勞喜其歸而遂室家之好其新其舊皆悅也嗚呼孰知夫夫婦正情天地大義哀樂相生孔子以為明目視之不見傾耳聽之不聞也是詩當次鵲鴉之前

既破我斧又缺我斨周公東征四國是皇哀我人斯亦

孔之將既破我斧又缺我錡周公東征四國是吡哀我人斯亦孔之嘉既破我斧又缺我鋤周公東征四國是邁哀我人斯亦孔之休

毛詩序曰周大夫以惡四國焉失詩旨矣孔將孔嘉孔休是詩之旨也四國可哀不可惡作是詩者知道矣知周公之心矣毛傳曰隋錡曰斧說文曰隋孔形狹而長也斨方錡斧也既破我斧又缺我斨喻三監淮夷破折我之多也毛以斧斨為喻禮義固穿鑿鄭

指喻毀周公傷成王二者亦不盡事情叛亂之禍民
人罹毒致管蔡誅伐其毀破豈小小哉總言破折之
多可也毛傳曰四國管蔡商奄也書序曰武王崩三
監及淮夷叛孔安國亦以管蔡商為三監案周禮太
宰建其牧立其監設其參傳其伍陳其殷置其輔注
云監謂公侯伯子男各監一國書王啟監厥亂為民
書序曰成王東征淮夷遂踐奄成王歸自奄然則所
謂淮夷者奄也齊詩作四國是匡賈公彥引以為据

然毛詩作四國是皇義亦嘉皇者尊大之稱周公東
征而四國咸尊大周公惟周公之心無私焉不得已
而征之其惻怛愛敬之心四國之民之所共知也惟
其君昏頑耳孔甚將大也作詩者其知道乎人知周
公東征定亂而已安知其為大也知其為甚大者知
其為道也周公行之其道益明東征之士與夫四國
之人皆可哀也而周公之征為甚大也毛傳曰鑿屬
曰錡木屬曰鉶孔疏云皆不審其狀吡吟也四國之

民歌周公之德也道斂也四國之叛者斂肅也東征之士與四國之民誠可哀而周公之征為甚嘉甚休也哀我人斯深得周公之心周公之心無私喜無私怒豈惟與東征之士同心與四國之民同心與天下之民同心與天地同心故曰孔將也孔嘉也孔休也道也韓詩云錡木屬錄鑿屬也解云今之獨頭斧伐柯如何匪斧不克取妻如何匪媒不得伐柯伐柯其則不遠我觀之子遵豆有踐

毛詩序曰伐柯周大夫刺朝廷之不知也言刺大悖
是詩周人欲成王盡誠於周公則公可安矣金縢之
書謂成王執書以泣曰今天動威以彰周公之德惟
朕小子其新逆則成王於周公無間矣而周人猶有
伐柯九戩狼跋之詩何也成王雖深感周公之德其
疑釋然及公歸燕饗之禮雖設獻酬交錯籩豆之荐
行踐以致禮而其中猶有毫髮未盡之疑終以前
者流言之故今雖尊禮而政柄不歸故九戩云公歸

無所又云公歸不復言不復其故所也周公歸不授以政猶伐柯而不以斧取妻而不以媒何以伐柯何以得妻何以得周公之心詩人於是再發其義曰執斧柯以伐木為柯二柯相去甚不遠成王執書以泣之心與周公之心相去本無間以其後隱然之疑復有以間之故未合覲見也我惟見周公籩豆有踐而已意謂成王不委之以政也詩人致意含隱不露如此而序曰刺焉可謂誣屈可謂悖厲籩豆有踐亦見小

雅伐木

九罭之魚鱗魴我覲之子衮衣繡裳鴻飛遵渚公歸無
所於女信處鴻飛遵陸公歸不復於女信宿是以有衮
衣兮無以我公歸兮無使我心悲兮

是詩大旨已見伐柯毛傳曰九罭綬罟小魚之網也
鱗魴大魚也周之禮公服自衮冕而下釋器云綬罟
謂之九罭孫炎曰九罭謂魚之所入有九囊也釋魚
云魴鱗魴魴郭璞云鱗似魴子赤眼者江東人呼魴

魚為鰕陸璣疏云鰕似鰓而鱗細於鰓赤眼然則鰕
鰓非大魚孔疏亦云則毛傳謂大魚非也此詩謂九
罭之網惟可以得鰕鰓爾不可以得大魚喻成王德
量之不大惟可以用中材不可以得周公之大聖之
子謂周公也覲見也我惟見周公衮衣黼裳而已而
王不委之以政鴻飛宜登天今也遵渚而已遵陸而
已公歸宜復冢宰之位今也不復無其所以居之詩
人於是託辭曰於女信處信宿乎言朝廷無位居公

也再宿為信夫是以惟有袞衣而已詩人不勝其悲
曰公歸而無位以處之不如無以公歸之愈也公歸
而不復故位徒使我心悲耳

狼跋其胡載震其尾公孫碩膚赤為几几狼震其尾載
跋其胡公孫碩膚德音不瑕

是詩本情已見伐柯毛傳曰跋躡震踏也老狼有胡
進則躡其胡退則踏其尾鄭箋云公周公也孫當讀
如公孫于齊之孫周公欲進則成王未授公以政如

狼跋其胡欲退則又深念民人社稷之重非召公畢

公諸賢所能了是欲退不可如狼蹏其尾

按樓鑰云周公雖進

退不可亦何至如狼之跋蹏故程氏有云狼獸之貪者猛於求欲故陷于機穽羅繫前跋後蹏進退困險詩人取之以言狼之所以致禍難危困如是者以其有貪欲故也若周公者雖在危疑之地安步舒泰赤烏凡几然也又云先儒以狼跋蹏不失其猛興周公不失其聖猛奚若虎豹胡獨取狼也詩人比興以類是以香草譬君子惡鳥譬小人豈有以豺狼興聖人乎程氏之說美矣然詩中無機穽之意猶未為盡也嘗得其說于蜀人楊少卿氏望云狼之遇人先旋繞于人之四旁甚疾人為之戰懼自失然後食之詩人蓋以狼之跋蹏比四國而周公孫奭順也碩大也膚處其中不懼也此說竅為得之

敏也赤烏几几愛敬之辭也其盛德之音終於無瑕
也使雖異順雖碩大而無庸敏之才則臨機應變不
無差失功業終不盛大久矣政卒歸于周公公何心
哉公之心天之心也廣大容覆而又應變徐施如四
時之運行如日月之代明時措咸宜保民人社稷數
百年之安鳴呼豈涓潔小節之士所能測識哉孔疏
老狼有胡謂領下垂胡說文云胡牛領垂也毛詩序
曰狼跋美周公也周公攝政遠則四國流言近則王

不知周大夫美其不失其聖也流言在鵲鴉之前是
詩在公歸之後序差 補音不瑕洪孤切史記龜策
傳日辰不全故有孤虛黃金有疵白玉有瑕事有所
疾亦有所徐太元衆首軍或纍車文人摧孥內蹈之
瑕禮記引詩瑕不謂矣鄭云瑕之為言胡也秦晉以
前凡從段者在平則讀如胡魏晉之間讀如何齊梁
之後讀為胡加切楚辭遠遊漱正陽而含朝霞精神
入而粗氣除司馬相如大人賦回車揭來兮會食幽

都呼吸沆瀣兮餐朝霞曹植洛神賦升朝霞與出淥
波叶左思蜀都賦霞與莪莪叶此以霞為何也又魏
都賦遐與羅叶陸機應嘉賦遐與波叶此以遐為何
也韓愈元和聖德詩瑕與拊叶又以遐為古白居易
效陶詩暇與坐叶

